

## Li nûton qui veut voltî lès djins.

Ni m' dijoz nin qui vos n' l'avez jamais rèscontré.

On p'tit drole, craus come on cint d' claus. Dissu s' tièsse, one pitite bonète. On dîreut vòy one vète grusale. Èle lî tchaît à mitan su sès deûs-ouys d'oûlote. Dès-orèyes come dès fouyes di djote. Èt avou ça, on p'tit nez qui r'crole èt one grande baube jamais faite ! Nin pus wôt qu' trwès pomes. C'èst Maniquèt. Maniquèt l' nûton do Trau dès Gades. Maniquèt, il èst conu long èt laudje. À sès pîds, dès gros solés avou dès chîlètes. I trèvautche lès campagnes quand l' solia èst coûtchî èt zoubler d'one coche su l'ôte. On nè l' veut jamais do djoû. I s' catche èt dwârmu dins one grande tchaussète.

Si maujone, si vos l' vièrîz, vos sèrîz sbaré. Tot-à l'intréye do Trau dès Gades, on gros aubwisson, one sôte di bolèt. Didins... À â ! didins... Sobayî s'i vos prîyereut on djoû èt vos mostrer !

I cause tot seû l' Maniquèt. On lingadje qui pèrson.ne vèci ni comprend. Quétefyie on flori lingadje què lî vint d' sès ratayons. Maîs vos l' p'loz bin rèscontrer, i r'lèverè s' tièsse èt sorîre après vos. Si manière da li d' vos fé sawè qu'i veut voltî lès djins.

On dit qu'i n' mougne qui do tchèt. One bièstrîye jamais parèy !

Maniquèt, c'èst l' dérin d'one famille qui vikeut paujère gn-a d' ça dès-ans èt dès razans. On djoû, pus rin po mognî. Il avin.n' chôpe leûs dints. Qui faleut-i fé ? Po si r'pache, il ont d'vu piyî lès cauves do tchèstia dès Quate Aubes. Il èstin.n' si télemint p'tits qu'i pinsin.n' qu'on n' lès vièreut nin. Gn-a nuk què l's-a vèyu. Nuk ? Ratindans todi. I ramèchenin.n' do fromadje, dès frûts, tot l'amougnî qu'i trouvin.n', qwè. On bia djoû – ou pus rade on laîd djoû – li pus vî dès nûtons a driglé lès montéyes èt piède si p'tite musète. On rat tot pèlé, qu'aveut vèyu leû djeu, a stî pwârter l' bèsace au tchèsturlin Mènîr èt lî raconter tot. Il aveut fé s' còp qu'on tchèt n'aveut nin lèvé s' quèwe ! Li monsieur a monté dins one râdje – qui lès meurs s'è sovègnenut co – èt adon, il a mètu l' feu aus cauves. Deûs djoûs pus taurd, on-z-a r'trové on rat rosti à crayas... li djudas qu'aureut co bin v'lu on bokèt d' fromadje por li tot seû.

Nos nûtons crèvin.n' di fwin tantia qu'on rèwèyî a atrapé on tchèt, li touwer èt l' discôper à fins bokèts po l' fé cûre è l' paîle. Li lèdmwin au matin, tos lès nûtons èstin.n' riwèd mwârts. Li tchèt aveut stî èpwèsoné li djoû di d'avant pa one vîye macrale do fond do bwès.

Seûlemint...

Seûlemint au pîd d'on bolèt, one tote pitite, pitite simince aveut djèté... Il a brâmint ploû dispû adon... On p'tit drole, craus come on cint d' claus, a mostré li d'bout di s' nez. C'èsteut l'èsté. Maniquèt qu'on l'a lomé.

Maniquèt n'a jamais pont mognî d' tchèt. Tos lès djoûs à l' brune, i vint toûrner èt racatoûrner èt zoubloter pad'avant lès-uchs dès maujones. Il a one pitite musète ritrovéye on djoû dins lès montéyes dès rwines d'on vî tchèstia. I cache après dès rèssets. Véci, on rèsse di pause ; véla, one miète di suke... Il è-st-eûreûs,

djwèyeûs, i mougne quausu d' tot, èt ç' qui lî chone co l' mèyeû, c'èst l'amougnî qu'èst d'né avou on grand sorîre. C'èst po ça qu'i veut voltî lès djins, Maniquèt.

Anne-Marie François